


歷代地理沿革表

一



歷代地理沿革表

(一)

陳芳績撰

叢書集成

初編

主編者
王雲五

商務印書館發行

歷代地理沿革表

本館據史學叢書
本影印初編各叢
書僅有此本

校刊歷代地理沿革表序

山西河東兵備道兼管山西陝西河南三省鹽法事務同里張大鏞撰

世之言地理者尙矣自括地志十道述亡佚外今總志存者惟李氏郡縣志樂氏寰宇記二家爲最先皆綜海內區宇考其古今之建置山川城郭之險要爲書厥後郡邑志因之而於藝文人物加詳焉繹其體例亦首列沿革而皆由今溯古非據古證今故紛糅輻輳附會參錯或所不免至于昔有今無名存地失暨旦暮廢置者更無論已求其上溯虞夏之九州下逮勝國之分省上下千年網羅放失并別部居貫串不遺者未之見也邑先輩陳君亮工生當明季隱居敎授慨焉有志以有虞之十二州秦之四十郡漢之千四百五十縣爲綱而取漢以下諸史地

志爲目。旁參唐宋以來輿地書及各省郡縣志經緯之分部郡縣三門爲沿革表四十七卷。凡一郡一邑之置廢分併遷徙升降雖在六朝之分裂十國之割據罔不博攷詳稽縷析條分而統歸一始是讀一書而九州之疆土古今之名號城邑之變遷瞭如指掌誠前此未有之書也。遺橐舊藏余友屈君侃甫家余覽而善之思廣其傳惜橐本頗有訛脫同里黃君琴六博雅士也屬其讎勘少加補正用付剞劂自是海內學者知李樂二書外尙有囊括宇內之鴻編蓋沈埋者百五十六年一朝復顯夫豈偶然此信足標藝林之勝不獨增閭里之光也。陳君吾邑語濂涇人其大父名梅與昆山顧亭林先生交亭林避地來虞偕居涇上者五載陳沒爲誌其墓君游從有素亭林集中有寄懷

酬答諸詩其學問蓋有淵源云

道光十三年歲次癸巳仲春月初吉

歷代地理沿革表自序

今人戴天不知天文履地不知地理以爲學之未至耶顧天雖高舉首可見昏晨一轉而三百六十五度之星辰歷歷在目若幅員數萬里既無豎亥之步亦無縮地之術孰能處處見之局脊一隅者六尺之外卽不知爲何物遊覽四方者至一境知爲某境過一城識爲某城人謂之曰卽古某某就信其爲古某某故以蘇長公之文章尙以黃州赤壁爲周郎困孟德之所豈不誤哉蓋後人附會名是實非比比皆然此地理沿革不可不攷也然古無成書歷代史與天下府州縣志大都紛紜錯雜牽拊重疊皆因作史者止就一代作志者止就一方未究根源而閱之者承訛襲舛終莫攷正良可慨夫余自甲申後棄舉子業究

心於天文地理之書著天下郡縣輿圖博觀二十一史廣搜天下志乘按其山川城郭形勢位置究其歷代淵源并編地理沿革表四十七卷表分三等一曰部表二曰郡表三曰縣表自古至今凡添設并省更名徙治之類纖悉具載綱目經緯井然有倫譬如千枝萬葉總由一本使閱者開卷瞭然按古則知今尋今則見古凡說有不同者皆明辨而詳注之俾後人不執兩端之惑其未能確然者兩存之以俟將來夫歷代之興廢不一地理之沿革各異或因其地而易其名或襲其名而遷其地又或地他徙而名隨以革昔人有云兗州可移而濟河之兗不可移梁州可遷而華陽黑水之梁不能遷誠能彙數千百年九州六合之記載參對詳核卽不能盡明抑亦什得八九矣所恨草茅

一介未能悉致天下之書表中或有遺誤尤願當世通儒碩彥攷而政之至于

大清肇基維新寰海輿圖損益攸始謹俟 國史紀錄續有增纂是所望於後之君子

康熙丁未冬十二月乙酉虞山陳芳績序

凡例

一舜建十二州牧漢倣其制而爲十三部刺史統轄天下郡縣至南北朝濫及二百餘隋復并而爲九唐變而爲十五道採訪使宋變而爲十九路安撫使元又更爲行中書省明則爲布政使司名雖異而體實同故作部表以虞爲首次漢至明凡十有二格

一秦以天下爲郡漢以後俱仍其制迨隋唐而或稱州又有曰府曰軍元則稱路明盡稱府皆以統縣故以秦爲首至明凡十有二格

一縣自春秋時楚子縣陳而名始見其時縣大於郡至秦始皇盡縣天下縣始隸於郡迄今數千年皆不改易縣亦當以秦始惟秦無紀載至漢書始有地理志縣名建置乃得詳書故縣表第據漢志爲斷其一二置自先秦暨春秋列國地名有可攷者皆附著漢格

一州之名一也歷代升降不同漢晉六朝總管郡國隋唐以後等夷郡守故隋以前列於部表隋以後列於郡表至元以後更不過縣比耳然亦能統縣故仍列郡表中

一隋唐州卽郡郡卽州隋書郡唐書州從史也

一隋開皇三年後俱州大業後俱郡唐武德三年後俱州天寶元年後俱郡乾元六年後俱州天下皆同不必概注凡於隋郡之下注或曰某州唐州之下注或曰某郡省文也

一青徐兗豫當南北之交宋魏之世日相爭奪郡縣失則以其流民僑置是以一郡一縣官無專制刺史守令五六同城難以具載止記其僑置州郡而已其僑置縣則略之

一凡郡縣無變遷者俱頂書有變遷者則另書一行於本行下注一遷字

一縣之遷徙有遷城者有遷治者遷城則另建一方遷治不過在城中改易公署耳遷城則改行書遷治不書

一州牧刺史自漢以前無常治東漢始有定在及三國至晉
屢變屢遷難以改治易行如郡縣之例故凡十二部皆一
直書下六格至南北朝後所分旣多唐宋所立名亦非古
皆仍前例頂書

一凡一代中有屢改名號者格中大字難以盡列俱照史志
正文題出大書餘皆於注中詳之其六朝時如遇南朝與
北朝異者大書南名從正統也北朝之前後異者大書魏
名魏有志也

一晉紀十六僭國五代十僭國俱附部表中有都之處中
朝有刺史者注中注出無刺史者特書之

一凡僭國所置名號俱旁書而不大書更冠以正朔所以別

正統也吳越大書已奉正朔也至于三國鼎立南北朝對峙不在此例

一漢建安中所置郡縣雖由于三國隋義寧初所置郡縣雖由於唐有仍書於漢隋本格內以名號尙存也

一凡各代因沿而無所改易者只書一仍字省文也

一部領若干郡郡領若干縣損益無常只從史書所載

一此郡之縣改隸彼郡曰改屬以縣分立新郡曰分屬郡廢而縣并某郡者曰并屬原係某郡分去而復歸曰復屬仍舊而郡名已改者曰仍屬

一諸府縣志苟非有確據而與史不同者從史

一凡有錯誤加辨論者俱於格中低一字書

一凡後代開設之縣不詳所自析者俱列於某郡所屬後

一次序俱從前漢書

一目錄注今某某者現在所有也其廢入別縣者注一廢字
棄於塞外者注一棄字有未詳者闕之

一有謂當以今府縣爲首以便觀者此作一代之書例也朝
廷有史府縣有志何用贅筆若數十代之沿革從無加意
余今所輯乃數十代之沿革也木有本後有枝水有源後
有流詎不然歟

原校刊例

一元臺部郡二表起虞秦下至元明列十二格縣表則自漢至明列十一格例殊不一今亦改從十二格仍準漢志千四百五十餘縣爲提綱大書其中有置自先秦閒列春秋戰國時事者則著于秦格庶例則從同仍不失作者之意一表中敘事引證辨正一格中有跨三四葉未盡者而下格多錯入他文翻閱殊未易今擇其于正文可斷者離之另作方圍書于左右空方俾上下文旣不淆雜而觀者亦覺醒目

一凡志表本列橫格不論直行但元臺意圖省紙上下格多彼此錯互看去殊不清楚今除郡縣有本相綴屬者仍牽